

摘藻堂四庫全書薈要

史部

欽定四庫全書薈要

史部

十國春秋卷

一百至
一百四

詳校官員外郎
臣楊世綸



欽定四庫全書薈要卷八千六百六十六

史部

十國春秋卷一百

檢討吳任臣撰

荆南一

歐陽脩五代史作南平張唐英補九國志作北楚今從十國紀年及宋史

武信王世家

武信王姓高名季興字貽孫陝州峽石人也本名季昌

避後唐獻祖諱更今名季昌自言東魏司徒昂之後少好武有膽氣與孔循董璋俱為汴州富人李讓家僮朱全忠鎮宣武時讓以入貲得幸養為子易其姓名曰朱

友讓通鑑作友恭又云友恭本李彥威薛史高季興傳以友恭為汴之賈人李七郎友恭傳云彥威以州

角事太祖十國紀年又以為壽州賈人今從歐史南平世家季興以友讓故得進見

全忠竒其才命友讓以子畜之因冒姓朱氏補制勝軍

使遷毅勇指揮使通鑑作親唐昭宗天復二年汴兵攻

鳳翔李茂貞堅壁不出梁王全忠議欲收軍還河中季

興獨進曰天下豪傑窺此舉者一歲矣今岐人已憊破

在旦夕而大王之所慮者閉壁以老我師此可以誘致

之也梁王壯其言命季昌募勇敢士得騎士馬景季昌

授以計引見梁王景曰此行無還理願錄其後嗣梁王
惻然止之景固請乃行景以數騎馳叩城門告曰汴兵
將東前鋒去矣岐人以為然開門出追汴軍汴軍隨景
後以進殺其九千餘人景死之岐後與汴和昭宗出贈
景官謚曰忠壯季昌由是知名明年拜宋州團練使從
破青州徙潁州防禦使復姓高氏當唐之末襄州趙匡
凝龍破雷彥恭於荆南表其弟匡明為留後汴兵攻襄
州匡凝奔于吳匡明奔于蜀而彥恭自朗州復來寇荆

南時留後賀瓌閉門自守梁王謂瓌殊怯除季昌荆南

節度觀察留後以代之蓋天祐三年十月也

王偁東都事畧云季

興唐末荆南司馬張環逐其節度使陳儒自稱留後環敗而季興守荆南今從通鑑

梁開平元年

夏四月太祖即皇帝位五月拜季昌荆南節度使

三楚新錄

云拜江陵尹兼管節度觀察處置等使

荆南舊統八州僖昭以來數為諸

道蠶食季昌至惟江陵一城而已兵火之後井邑凋零

季昌招輯撫綏民皆復業是月季昌進瑞橘數十顆于

梁六月武貞節度使雷彥恭會楚兵來攻江陵季昌引

兵屯公安絕其糧道彥恭敗楚兵亦走秋九月彥恭又
攻涪陽公安擊却之丙申梁詔季昌討彥恭冬十月遣
牙將倪可福會楚將秦彥暉攻朗州二年夏四月淮南
將李厚入寇季昌敗之于馬頭秋九月遣兵屯漢口絕
楚朝貢路孝感縣志作九月乙未屯孝昌楚命許德勳擊我于沙頭季
昌懼而請和是歲梁加季昌同中書門下平章事三年
秋八月梁叛將李洪侵江陵倪可福擊敗之梁復詔馬
步都指揮使陳暉會我兵討洪四年夏六月楚將入寇

季昌擊破于油口斬首五千級逐北至白田而還明年

梁改元乾化二年季昌潛有據荆南之志乃治城塹設

樓櫓奏築江陵外城增廣

缺

丈復建雄楚樓

按江陵志樓在

北城下唐杜甫有西北樓成雄楚都之望江樓為扞敵

句高氏因以名內城樓或作楚雄樓非

執畚鍤者十數萬人將校賓友皆負土相助郭外五十

里冢墓多發掘取甃以甃城畢工之後數聞鬼泣及見

燐火焉是時稽課土功于郢城北土人因名其山曰稽

功山會梁太祖殂季昌見梁日衰弱既得倪可福等為

將帥梁震司空薰王保義等為賓客遂謀阻兵自固以

兵攻歸峽為蜀將王宗壽所敗又發兵聲言助梁擊晉

因侵襄州復為節度使孔勅所敗自是與勅交惡乃絕

貢賦累年是歲吳陳璋寇江陵遣可福將兵拒之三年

春正月璋班師還我兵會楚師邀之璋駢舟二百艘為

一列夜過江口追之不及秋八月乙亥梁主鐔封季昌

為渤海王

一作勃海

賜以袞冕劍珮于是造戰艦五百艘修

餽器械為攻守之具招聚亡命交通吳蜀二國中朝寢

不能制

乾化四年春正月王以夔萬忠涪四州舊隸荆南興兵
攻蜀夔州刺史王成先逆戰王縱火船焚蜀浮橋蜀招
討副使張武舉鐵絙拒之船不得進我兵焚溺死者甚
衆會飛石中王戰艦之尾王遁還我兵大敗俘斬五千

及續蜀藝文志云永平四年荆南高季昌侵
巫山道嘉王宗壽敗之瞿唐疑即此事

貞明元年冬十一月乙丑梁改元是歲梁主更名瑱

貞明二年

缺

月嶺南王定保來聘

貞明三年夏四月王與梁山南東道節度使孔勅修好

復通貢獻是時王築堤自安遠鎮北祿麻山南至沱步

淵延亘一百三十里以障襄漢之水居民賴焉名曰高

氏堤

江陵志餘云高氏常修築金隄厥後江勢改徙隄遷于外而看花臺一帶數十里猶存故蹟土人

呼為高王古隄焉

貞明四年

貞明五年夏五月楚人入寇王求救于吳吳命鎮南節

度使劉信帥洪吉撫信步兵自瀏陽趣潭州武昌節度

使李簡帥水軍攻復州信至潭州東境楚兵引去簡入復州執其知州鮑唐是歲改建內城東門樓曰江漢樓又築仲宣樓于荊州城之東南隅

貞明六年

龍德元年夏五月丙戌朔梁改元六月乙卯朔日有食之冬十二月遣都指揮使倪可福督修江陵外郭王巡城責功程之慢杖之是歲以僧齊己為僧正給其月俸禮待于龍興寺禪院

龍德二年

龍德三年夏四月己巳晉王即皇帝位國號大唐改元
同光冬十月戊寅梁亡唐下詔慰諭司空薰等皆勸王
入覲新主梁震切諫以為不可恐懷王之患復見今日
王曰吾已決矣多言奚為留二子守江陵以騎士三百
人自衛朝于洛陽改名季興十一月己未唐加王守中
書令是時王至京師唐王待之良厚而左右伶官求貨
無厭王心頗不平唐主欲留王樞密使郭崇韜諫曰唐

新滅梁得天下方以大信示人今四方諸侯相繼入貢
不過遣子弟將吏季興獨以身述職為諸侯率宜加恩
禮以諷動來者而反縻之示天下不廣且絕四方內向
之意不可唐主乃厚禮而遣之唐主常問王曰吾已滅
梁今天下負固不服者惟吳蜀耳朕將有事于蜀而蜀
地險阻尤難江南財隔荆南一水朕欲先之何如王曰
蜀地富民饒獲之可建大利江南國貧地狹民少得之
徒無益宜伐蜀便臣請以本道兵先進唐主大悅以手

拊其背王因命工繡其手迹于衣以為榮耀王既行即
倍道兼進至許州謂左右曰此行有二失來朝一失縱
我去一失行已浹旬唐主殊內悔遽以急詔命襄州節
度使劉訓伺便圖之王過襄州就館而心動顧從者曰
梁先輩之言中矣與其住而生不若去而死遂棄輜重
與部曲數百人南走至鳳林關日已旰斬關而出薛氏五代
史云過襄州節度使孔勅留宴
中夜斬關而去今從五代史補王疾驅而詔書夜至訓
度其去遠不可追乃止十二月丁酉王至自洛京握梁

震手悔謝曰不用君言幾不免虎口因言是行也入朝
放還彼此均失且主上百戰以取河南對功臣誇手鈔
春秋又曰我于手指上得天下其自矜伐如此而荒于
遊畋政事多廢吾可無慮矣由是繕城積粟招納梁舊
兵為戰守之備是歲改修天皇寺

同光二年春三月丙午唐加王兼尚書令

五代史補
作中書令

進

封南平王王謂梁震曰此恐吾與蜀連衡也是時王過
愚亭命圖威武王及愚翁象于亭上亦曰高氏亭愚翁

者高駢從弟驤也

名勝志云高崇文之孫驤號愚翁隱于唐年縣

同光三年秋九月唐以王為西川

一作峽路

東南面行營招

討使伐蜀仍詔取夔忠萬歸峽五州為巡屬

一作夔忠萬三州今

從南平世家

王常欲取三峽畏蜀峽路招討使張武威名不

敢進至是乘唐兵勢使其子行軍司馬從誨權軍府事

冬十月統水軍上峽取施州蜀將張武以鐵鑱斷江路

王命勇士駕舟斫之會風起舟絙于鑱為武所敗王遁

還夔忠萬等州隨詣魏王繼岌降十一月唐師滅蜀王

方食聞蜀亡遽失匕箸曰是老夫之過也倒持太阿授人以柄柰何梁震曰不足憂也唐主得蜀益驕安知不為我福

同光四年春二月王表請夔忠等州一作夔忠萬三州見十國紀年及

雲安監隸本道唐主許焉詔未下時門下侍郎豆盧革

同門下中書平章事韋說實內主之也夏四月梁震薦

前陵州判官孫光憲于王王命光憲掌書記時王欲攻

楚大治戰艦光憲以為荆南士民始有生意未可與楚

交惡王然其言而止是月唐主遇弒丙午李嗣源即皇
帝位甲寅改元天成六月甲寅王表求夔忠萬歸峽五
州于唐為屬郡畧言去冬先朝詔命攻峽內屬郡尋有
施州官吏知臣上峽率先歸投夔忠等州一作夔忠
萬三州旦
夕期於收復乃被郭崇韜專將文字約臣回歸方欲陳
論便值更變唐大臣多謂王請自取諸州而兵出無功
不當以諸州與我唐主重違王意不得已許之

天成二年春二月王既轄夔忠等州復請唐勿除刺史

自以子弟為之唐主不允時夔州刺史潘炕罷官王遣

兵突入州城殺戍兵而據之唐除奉聖指揮使西方鄴

為刺史王拒而不納復遣兵襲唐之涪州不克初魏王

繼炭遣押牙韓琪一作琪部送蜀珍寶金帛四十萬浮江

而下王殺琪等十餘人于峽口盡掠其貲重至是唐加

詰問對曰琪輩舟行下峽逾越險阻凡數千里欲知覆

溺之故自宜按問水神唐主大怒壬寅制削王官爵以

山南東道節度使劉訓為南面招討使知荆南行府事

忠武節度使夏魯奇為副招討使將步騎四萬侵江陵
又命東川節度使董璋充東面招討使新夔州刺史西
方鄴副之將蜀兵下峽仍會湖南軍三面進攻璋竟未
常出兵三月訓兵至江陵楚遣都指揮使許德勳將水
軍屯岳州王堅壁不戰乞師于吳吳人率水軍來援會
江陵卑濕復值久雨將士多疾疫訓亦寢疾夏四月唐
主命樞密使孔循來審攻戰之宜五月循至于江陵攻
之百端不克遣人入城說王王語不遜丙戌唐遣使賜

湖南行營夏衣萬襲丁卯又遣使賜楚王殷鞍馬玉帶

督饋糧于行營竟不能得庚午唐詔劉訓引兵還是月

楚貢使史光憲自唐歸唐主賜楚王殷駿馬十美女二

過于江陵王執光憲而奪之請舉鎮附于吳吳臣徐溫

曰為國者當務實效而去虛名高氏事唐久且洛陽去

荆南近唐人襲之易我以舟師泝流救之甚難夫臣人

勿能救寧無媿于心乎乃受貢物而辭我稱臣六月西

方鄴敗我軍于峽中復取夔忠萬三州唐詔西川兵防

夔州孟知祥遣左肅邊指揮使毛重威戍之秋七月唐

升夔州為寧江軍以鄴為節度使

歐史西方鄴傳云已而又取歸州數敗李

興之兵然他書無取歸州之事今不從

癸酉唐追與我夔忠等州罪賜宰

相豆盧革韋說死

五代史豆盧革傳云初韋說常以罪竄之南海遇赦還寓江陵與高季興

相知及為相常以書幣相問遺唐兵伐蜀季興請以兵入三峽莊宗許之使季興自取夔忠萬歸峽等州為屬郡及破蜀季興無功而唐用它將取五州明宗初即位季興數請五州以為先帝所許朝廷不得已而與之及革說再貶因以其事歸罪二人天成八月己卯朔日食

冬十月壬午月犯五諸侯癸未地震是歲築內城以自

固名曰子城

江陵志餘云子城高氏內城也倪福可所築

建樓于內城東門

上曰江漢樓置荆門軍于當陽縣

乾貞二年春三月楚遣六軍使袁銓副使王環監軍馬希瞻將水軍入寇王與楚師戰于劉郎洑先是希瞻匿戰艦于水港至是出戰艦橫擊勢不可遏我師敗績俘斬以千計楚人進逼江陵王歸史光憲以求成是役也楚王責王環不遂取荆南環曰江陵在中朝吳蜀間四戰之地也宜存之以為扞蔽楚王是之是月孟知祥請

召戍夔之兵還唐主不許其將毛重威帥其衆鼓噪遁
歸夏四月吳將苗璘王彥章會我兵攻岳州為楚所鹵
六月辛巳王以荆歸峽三州復稱藩于吳奉吳正朔王子從
誨切諫不聽吳封王為秦王唐命楚出師問罪楚王遣
許德勳大入以其子希範為監軍師次于沙頭王從子
雲猛指揮使從嗣死之王再求成德勳引兵還九月辛
巳金火合于軫敗楚兵于白田執楚岳州刺史李廷規
歸于吳己亥唐以武寧節度使房知溫兼荆南行營招

討使知荆南行府事分使發諸道兵會襄陽以入寇冬

十二月壬寅朔熒惑犯房金木相犯干斗乙卯月有食

之王寢疾命子從誨權知軍府事丙辰王薨

唐明宗實錄天成三

年十一月壬午房知溫秦高季興卒按陶穀季興神道碑勃海行年記皆云十二月十五日卒今從之年

七十一謚曰武信葬于江陵城西之龍山鄉

江陵志餘云城西有

高王廟祀武信王一稱土主廟又太白湖口有高陵廟

翰林學士陶穀撰神道碑

初王常從梁太祖出征引軍旦發至逆旅未曉有嫗秉

燭而迎執禮甚謹王疑之嫗曰適夢金甲神排戶呼曰

有王者來宜速起將軍得非其人邪王大悅而去卒符
其言王雖武人頗折節好賓客遊士縑流至者無不傾
懷結納詩僧貫休齊己皆在所延攬而貫休以忤成汭
故遁放黔中後復來遊江陵王優禮之館于龍興寺會
有謁宿者言時政不治貫休乃作酷吏辭刺之辭云霰
雨灑灑風吼如斲有叟有叟暮投我宿吁歎自語云太
苛酷如何如何掠脂幹肉吳姬唱一曲等閒破紅束韓
娥唱一曲錦段鮮照屋寧知一曲兩曲歌曾使千人萬

人哭不惟哭亦白其頭饑其族所以祥風不來和風不復蝗兮螿兮東西南北王聞之雖被疎遠而亦不甚罪焉

論曰武信失策未有如入覲洛京與勸唐伐蜀

缺

二事

者夫以莊宗之猜忍要何愛乎荆南乃頓釋狐疑幸免虎口危矣至荆蜀成唇齒之形不待智者知之審也而從吏興師鼓行前進牯糠及米事有固然假門高之難不作江陵尚有寧宇邪雖然蕞爾荊州地當四戰成趙

相繼亡不旋踵武信以一方而抗衡諸國間或和或戰
戲中原于股掌之上其亦深講于縱橫之術也哉

十國春秋卷一百

欽定四庫全書蒼要卷八千六百六十七

史部

十國春秋卷一百一

檢討吳任臣撰

荆南二

文獻王世家

文獻王名從誨字遵聖武信王有九子而從誨其長子也為人明敏多權計開平中入梁為供奉官累遷鞍轡庫使賜告歸省武信王武信王留為馬步軍都指揮使行軍司馬未幾加忠義節度使同平章事武信王既薨

從誨遂襲位吳睿帝以從誨為荆南節度使兼侍中吳太和元年夏四月丙午楚將王環敗我軍于石首從誨以父自絕于唐懼復見討謂僚佐曰唐近而吳遠舍近臣遠非計也乃遣使聘于楚楚王殷為請命于唐又復遺唐山南東節度使安元信書求保奏復修職貢而從誨亦遣神牙劉知謙奉表內附自稱前荆南行軍司馬歸州刺史進贖罪銀三千兩明宗納之是年秋七月甲申拜從誨荆南節度使兼侍中追封先王為楚王謚武

信已丑罷荆南招討使

從誨仍奉唐正朔

長興元年春三月從

誨奉表詣吳告以墳墓在中國恐為唐人所討吳人援之不及謝絕之吳遣兵問罪不克而返二年春正月唐加從誨檢校太尉兼中書令江陵尹三年春二月唐賜爵渤海王冬十月貢銀茶于唐以求戰馬唐明宗以荆南內地何煩設備賜馬二十匹却王獻

天成四年冬十一月唐主亶殂于雍和殿十二月癸卯朔宋王從厚嗣皇帝位

應順元年春正月戊寅唐大赦改元壬辰改封王為南
平王夏唐潞王從珂自立為帝改元清泰唐使臣李鱗
馬承翰至自楚鱗求賀于王王贈以馬紅裝拂二猓獠
皮一

清泰二年春正月左右稱楚王豪靡王曰馬王可謂大
丈夫矣孫光憲言馬氏奢僭將亡又何足慕王深然之
是歲梁震固請退居王為築室土洲震披鶴氅自稱荆
臺隱士王盡以政事屬光憲

清泰三年夏四月王遣使奉牋勸吳臣徐知誥即帝位
冬十一月契丹立石敬瑭為天子國號晉己亥改元天

福是歲迎彌勒瑞像于萬壽寺

江陵志餘云彌勒瑞像現于高氏清泰間隨吳

商葉旺船至荆登岸乃知為像高氏迎之從香烟所指置城西北隅萬壽寺右手缺中指屢鑄不成後漁人得之高沙湖以補缺處如生成

天福二年春正月乙卯日有食之冬十月吳徐知誥稱帝
國號曰齊庚子遣使來告即位十一月王表請于齊置
邸金陵許之十二月乙卯朔日有白虹二

天福三年春正月甲子王遣龐守規如齊賀即位三月
壬子日有白虹二夏五月壬子月犯上將是時作僧伽
妙應塔

天福四年春二月齊主復姓李氏改國號唐更名昇是
月王使王崇嗣如唐賀南郊

天福五年春三月晉山南東道節度使安從進謀叛王
陰與之通冬十一月丁丑月有食之是歲晉翰林學士
陶穀為王生辰國信使來聘于我王宴穀望沙樓

案仲宣樓

在城東南隅相傳即高氏望沙樓也蘇軾詩云朱檻城東角高王此望沙即此

大陳戰艦于樓

下謂穀曰吳蜀不賓久矣願修武備習水戰以待師期穀還具道王語晉主大喜復遣使賜甲馬百匹

天福六年夏四月晉安從進反求援于我王遺從進書陽為拒絕從進怒誣王以他事王用行軍司馬王保義言具奏其事于晉且請助兵討之冬十一月遣使貢晉金器一百兩御衣段羅綾絹一百五十疋白龍腦香二斤九鍊純鋼金花手劍二口謝恩賜御馬又別進賀冬

至銀五百兩十二月丁亥晉以高行周知襄州行府事
詔我兵會楚兵討襄州王遣都指揮使李端將舟師數
千至南津為應且以兵糧助晉

天福七年夏六月晉主殂于保昌殿齊王重貴立秋八
月晉高行周陷襄州安從進舉族自焚王求郢州為屬
郡晉不許是時王遣使如蜀請翰林待詔李文才圖義
興門石筍并其故事

天福八年夏四月戊申朔日有食之是時王鑿江陵城

西南隅為池

江陵志餘云清風池在城東北隅方數百步清深鏡潔潭而不流高氏之所鑿也

立亭于上曰渚宮先是城東南舊有渚宮

楚項襄王之離宮也

王

特做其名而稱之又置亭于渚宮側曰迎春

開運元年秋七月辛未朔晉大赦改元晉學士王仁裕

來聘王出十伎彈琴以樂之

韻府羣玉載從誨有句云紅妝齊抱紫檀槽一抹朱

弦四

十條

開運二年秋八月甲子朔日有食之是歲建杞梓堂又

建木屏亭

開運三年春二月壬戌朔日有食之冬十二月契丹執
晉主重貴以歸

開運四年春正月王遣使入貢于契丹契丹以馬來賜
亦遣使間道詣太原劉知遠勸進且言王得天下願乞
郢州為屬知遠陽諾之二月辛未北平王知遠即皇帝
位自言未忍改晉國又惡開運之名更稱天福十二年
夏六月改國號曰漢仍以天福年號遣使來告諭王上
表賀登極進金花銀器一千兩異紋綺錦法錦三百疋

筒卷白羅二百疋白花羅一百疋絨毛暖座兩枚九鍊
純鋼手刀一口仍求郢州漢主不許及加恩使至王遂
拒而不受秋九月王聞杜重威叛發水軍襲漢襄州為
山南東道節度使安審琦所敗又攻郢州州刺史尹實
大破我師

一作尹賞

王乃絕漢附於唐蜀

乾祐元年春正月乙卯漢大赦改元己未漢主更名暉
丁丑殂于萬歲殿二月辛巳周王承佑嗣皇帝位夏六
月王既與漢絕北方商旅不至境內貧乏乃遣使謝罪

乞脩職貢進漢金器二百兩銀器千兩細錦五十疋繡
錦六銖五十段羅二百疋龍腦香二斤漢下詔慰撫之
是歲漢遣國子祭酒田敏使于楚假道于我王問敏中
國虛實以為契丹之後兵食皆殫意欲以誚敏敏為言
杜重威悉以晉戈甲降契丹契丹置之鎮州未嘗以北
而晉兵皆漢有也王不悅敏以甲本五經遺王王謝曰
予之所識不過孝經十八章爾敏曰至德要道於此足
矣因誦諸侯章曰在上不驕高而不危制節謹度滿而

不溢王以為譏已即以大卮罰敏荆南地狹兵弱介于
吳楚為小國自吳稱帝而南漢閩楚皆奉中原正朔歲
時貢奉多假道荆南于是武信王及王常邀留其使者
掠取其物而諸道移書責誚或發兵加討即復還之而
無慚色其後南漢與閩亦稱帝惟王所嚮稱臣利其賜
予故諸國賤之皆目為高賴子又曰高無賴俚語謂奪
攘苟得無媿耻者為賴子也王性雅好馬常不惜千金
求良駿竟沒世不遇以此為恨冬十一月寢疾命子保

融判內外兵馬事癸卯王薨年五十八明年十二月漢
主勅曰故荆南節度使南平王高從誨宜太常定謚故
事臣下請謚故吏陳行狀上考功覆奏下乃議謚今降
勅新例也謚議上謚曰文獻贈尚書令葬龍山鄉翰林
學士陶穀撰神道碑按江陵志三王神道碑及渤海
高公保勗神道碑皆穀所撰

貞懿王世家

貞懿王保融

馬令南唐
書作保庸

字德長文獻王第三子也莫知

其得立之因唐長興初以廕補太子舍人賜緋晉天福

中制授檢校司空判內外諸軍俄遷荆南節度副使開
運末領峽州刺史累加至檢校太傅及文獻王薨保融
權知軍府事是為漢乾祐改元之十一月也十二月丁
丑漢制授起復檢校太尉同平章事江陵尹荆南節度
荆歸峽觀察使是年葬先王于江陵之龍山漢主遣翰
林茶酒使郭允明來賜衣幣允明車服導從如節度使
令人荷御酒數十甕
宴集輒厲聲索御酒乃陰使人步測其城池高下若為
攻取之計者以動我國人皆恐保融重賂允明以遣二

年冬十月丙戌漢以三叛平加保融檢校太師兼侍中
三年冬蜀施州刺史田行臯來奔保融曰彼貳於蜀安
肯盡忠于我執而歸之周廣順元年春正月太祖即皇
帝位保融表賀登極貢白金一千兩法錦二十疋周加

保融兼中書令封渤海郡王

宋史作
渤海

正衙命使禮部尚

書王易副使刑部郎中景範發冊仍賜禮服冠劍

廣順二年春二月庚寅太白經天是歲周主命內臣李
廷玉賜王馬且問所好何馬王曰良馬千萬無若一駿

倘使坐下坦穩免勞控制惟扇庶幾也既免蹄齧不假
銜枚兩軍列陣萬騎如一苟未經扇亂氣狡憤介胄在
身與馬爭力聲控不暇安能左旋右抽捨轡揮兵乎

云一

此文獻王
論馬之言

廣順三年夏六月遣使貢周白龍腦香及法錦五十疋
鹿胎袴段六鎰襜面等各一百事

顯德元年春正月丙子朔周大赦改元進封王為南平
王壬辰周主威殂于滋德殿丙申晉王榮嗣位是時王

修江陵大堰改名曰北海周加王守中書令

顯德二年

顯德三年春正月周主下詔征淮南王遣指揮使魏璘率兵三千出夏口以為應又遣客將劉扶奉牋于唐勸其內附二月丁亥貢周御衣金帶九鍊純鋼手刀弓箭諸物

顯德四年春二月周主南征三月丁未周師克唐壽州冬十二月丁丑周師取唐泰州

顯德五年春正月丁亥周師取唐海州壬辰又陷唐靜
海軍丁未又克唐楚州王遣魏璘帥戰艦百艘東下會
周伐唐至于鄂州二月甲寅周師拔唐雄州夏五月唐
主李景稱臣于周周主得王所與唐國牋大喜賜絹萬
疋六月王遣使勸蜀主稱藩中朝蜀主報以前歲濮州
刺史胡立歸致書于周不荅冬十月王再遣蜀主書勸
稱臣中朝庚子王聞周師伐蜀請以水軍趣三峽周主
下詔褒之荆南自後唐以來數歲一貢京師而中間兩

絕及顯德時無歲不修職貢王又謂器械金帛皆土地
常產不足以効誠節乃遣其弟保紳入朝周主益嘉之
初武信王之鎮梁也以兵五千為牙兵衣食皆給于梁
洎天成長興間歲給以鹽萬三千石後不復給至是周
平淮南乃命泰州給之

顯德六年夏六月癸巳周主榮殂梁王宗訓立加王守
太保是歲王奏授長子繼冲為荆南節度副使

建隆元年春正月宋受周禪王益懼一歲三入貢于宋

宋帝恩禮有加加王守太傅秋八月王以疾薨年四十
一亦葬龍山鄉至今有高氏三王墓云計聞宋帝廢朝
三日遣儀鸞使李繼超賜賻物兵部尚書李濤兵部郎
中率汀持節冊贈太尉太常因革禮云故推誠奉議同
德翊戴功臣荆南節度歸峽等
州觀察處置等使特進檢校太師守太傅兼中書令江
陵尹上柱國南平王食邑四千五百戶食實封一千三
百戶高保融奉一作謚貞懿一作王迂闊淹緩無材能一時
敕可贈太尉

政事悉委弟保勗

侍中保勗世家

保勗清異錄作保勉字省躬文獻王第十子貞懿王同母弟也

晉天福初起家領漢州刺史貞懿王嗣政令判內外諸

軍事周廣順元年加檢校太傅充荆南節度副使顯德

初從貞懿王之請加檢校太尉充行軍司馬領寧江軍

節度使貞懿王即世保勗權知軍府事奉章以聞宋太

祖即拜保勗荆南節度使建隆二年遣弟保寅入貢初

貞懿王於絕南城北決江水瀦之凡七里餘謂之北海

事見前篇以閔行者太祖因保寅自汴歸諭旨令決去使道

路無阻保勗少多病體貌臞瘠頗有治事才至是滯汙
無度日召倡伎集府署擇士卒壯健者令恣調謔乃與
姬妾垂簾共觀以為娛樂又好營造臺榭窮極土木之
工有估客自嶺外來得龍眼一枝約四十圍共千枚獻
于保勗保勗命作琅玕檻子置之名曰海珠藪其玩物
多此類也國政不理軍民咸怨從事孫光憲切諫不聽
未幾寢疾顧梁延嗣曰諸兄弟中孰可昇後事延嗣曰
先王子繼冲長矣保勗領之即以繼冲判內外兵馬建

隆三年十一月保勗卒年三十九宋帝聞計廢朝二日
贈侍中遣御厨使李光睿賻祭初保勗在保抱文獻王
獨鍾愛之或盛怒見必釋然而笑荆人目為萬事休及
保勗之立藩政離弱卒裁數月遂失國亦預兆也

侍中繼冲世家

繼冲字成和宋史及東都事畧云貞懿王長子也周顯
字贊平今從歐陽史

德六年以蔭授檢校司空領荆南節度副使宋建隆三
年保勗疾革命繼冲權知軍府保勗既歿宋除繼冲檢

校太保江陵尹荆南節度使先是太祖遣盧懷忠來使
謂之曰江陵人情去就山川向背我欲盡知之懷忠還
言繼冲甲兵雖整而控弦不過三萬年穀雖登而民困
于暴歛南邇長沙東距建康西迫巴蜀北奉朝廷其勢
日不暇給取之易也會湖南張文表叛周保權求救于
宋宋太祖謂宰相范質曰江陵四分五裂之國今出師
湖南假道荆渚因而平之萬全策也乾德元年春正月
乃命慕容延釗帥師平湖南樞密副使李處耘為都監

且詔江陵發水軍三千人赴潭州繼冲即遣親校李景威將以往二月處耘至襄州遣其將丁德裕來諭假道

之意

三楚新錄云李處耘以路由江陵慮繼冲不測遣使諭之曰比者王師救應東道之主誠在足下然

利在急速故不淹留但假一鄉道使於城外經過幸矣

景威力言城外之約不可

信孫光憲叱之言于繼冲曰宋帝規模宏遠不若早以疆土歸之不惟免禍而亦不失富貴繼冲乃遣從父保寅奉牛酒犒師于荆門且覘強弱處耘待之有加繼冲以為無虞也是夕延釗名保寅宴帳中處耘密遣輕騎

數千前進繼冲聞宋師奄至即惶怖出迎遇處耘于江陵北十五里處耘揖繼冲令待延釗而前鋒遽入州城

宋史李處耘傳云處耘至襄州先遣閤門使丁德裕假道荆南請具薪水給軍荆人辭以民庶恐懼願供芻餼於百里外處耘又遣德裕諭之乃聽命遂令軍中曰入江陵城有不由路及擅入民舍者斬師次荆南高繼冲遣其叔保寅及軍校梁延嗣奉牛酒犒師且來覘也處耘待之有加諭令翌日先還延嗣大喜令報繼冲以無虞荆門距江陵百餘里是夕召保寅等飲宴慕容延釗之帳處耘密遣輕騎數千倍道前進繼冲但竢保寅延嗣之還遽聞大軍奄至即惶怖出迎遇處耘於江陵北十五里處耘揖繼冲令待延釗遂率親兵先入登北門比繼冲還則兵已分據城中荆人束手聽命繼冲亟歸即調發江陵卒萬餘人并其師晨夜趨朗州

見旌旗甲馬布列衢巷乃以肩輿幕井上給內人入輿

多墮井死

江陵志餘云高氏井在子城內高王後苑之井也宋兵入城繼冲以轎覆井給內人多墮

死後人哀之植栢建祠于上

遂詣延釗納牌印盡籍其境內州府三

江陵府歸峽二州

縣一十七

一作十六

戶一十四萬三千三百遺客

將王昭濟蕭仁楷奉表于宋宋太祖令御厨使郃岳持

詔安撫賜以衣服玉帶器幣鞍馬署樞密承旨王仁贍

為荆南都巡檢使而授繼冲荆南節度使如故又授繼

冲馬步都指揮使梁延嗣為復州防禦使節度判官孫

光憲為黃州刺史右都押衙孫仲文為武勝軍節度副使知進奏鄭景玫為右驍衛將軍王昭濟左領軍衛將軍蕭仁楷供奉官繼冲籍管內芻糧錢帛之數及獻錢五萬貫絹五千匹布五萬匹于宋三月宋詔鞍轡庫使翟光裔齎官告旌節賜繼冲并存問參佐官吏等又除授貞懿王兄弟諸父官有差復命王崇範為節度判官高若拙觀察判官梁守彬江陵少尹韋仲宣掌書記胡允脩節度推官州縣官悉仍舊別賜管內符印夏五月

保紳等入朝各賜京城第一區六月宋命王仁瞻兼知
軍府事會是歲太祖有事于南郊繼冲上書願陪祠九
月具文告三廟率其將吏家族五百餘人朝于京師十
月至闕下獻金銀器錦帛寶裝弓劍繡旗幟象牙玉鞍
勒及郊祀銀萬兩太祖賜賚甚厚郊禋畢授繼冲徐州
大都督府長史武寧軍節度使徐宿觀察使繼冲鎮彭
門幾十年委政僚佐部內亦治開寶六年卒年三十一

東都事畧云
年三十六

計聞太祖廢朝二日贈侍中遣中使護喪

葬事官給自梁開平元年武信王據有荊州旋得歸峽

傳襲四世五帥至宋乾德改元國除凡五十七年初乾

祐中貞懿王命工鑿池

江陵志餘作文獻王未審是非

得石匣長尺餘

扁鐫甚固亟屏左右啟之乃金篆六字曰此去遇龍即

歇

一云焚香啟匣得石有文云云

王甚秘其事至是高氏立國果盡于

建隆之末又荆南尚使甕器皆高其足公私競製用之

謂之高足椀及宋軍臨城舉族東遷是亦高足識之應

也

論曰真人出四海一理勢之必然也天水肇興羣雄漸
削即無伐虢滅虞之謀高氏其能常守此土乎光憲知
幾所由與賣國以徼富貴者異矣

十國春秋卷一百一

欽定四庫全書蒼要卷八千六百六十八

史部

十國春秋卷一百二

檢討吳任臣撰

荆南三

列傳

武信王夫人張氏

夫人張氏者故武信王愛姬而文獻王之母也武信王隸梁戲下時每行軍必挾夫人與俱一夕軍敗誤入深澗中會夫人方娠文獻王宛轉不能起王懼追兵且至

竢夫人熟寢以巨劔刺兩岸期岸崩以厭之既而夫人
遽驚呼曰適夢泰山頽厭妾身賴金甲執戈者抵之獲
免王遂挈之行未幾生文獻王以富貴終

武信王子從翊

從詵

從讓

從謙

武信王從子從嗣

從義

文獻王子保勲保正

保紳

保寅

保緒

保節

保遜

保衡

保膺

貞懿王子繼克

武信王五女

從翊武信王子也官合州刺史歸宋遷右衛將軍

從詵武信王弟缺子文獻王弟也繼冲時為牙將降宋

改右衛率府率

從讓武信王弟缺子入宋授左清道率府率

從謙武信王弟缺子降宋擢左司禦率府率武信王子

九人文獻王而下知其名氏者四人餘不具見

從嗣武信王從子也為人驍勇有力喜馳突深入敵軍
率以為常積功至雲猛指揮使天成二年楚武穆王遣

許德勳入寇以其子希範為監軍師次沙頭從嗣恃勇
單騎造楚壁請與希範挑戰決勝負為楚將廖匡齊所
殺王懼遂與楚和

從義亦武信王從子也視貞懿王為季父行顯德時從
嗣謀作亂其徒高知訓告變貞懿王命徙于松滋已而
殺之竟以不良死

保勳文獻王第一子保正文獻王第二子皆貞懿王兄
也文獻王十五子今可考者保勳保正文懿王保紳保

寅保緒保勗保節保遜保衡保膺十一人而已

保紳文獻王第

缺

子也周顯德時貞懿王與世宗通好

以為器械金帛不足以效忠節乃命保紳入朝致歸順之意世宗大悅遂詔以秦州鹽給荆南牙兵保紳歷官江陵少尹歸宋擢衛尉卿

保寅字齊巽文獻王第

缺

子晉天福七年以蔭授太子

舍人賜緋累加檢校司空貞懿王時奏授節院使宋興保勗既襲荆南節鎮命保寅入覲汴京太祖召對便殿

慰藉甚至授掌書記遣還保寅語保勗曰真主出世天
將混一區宇允宜首率諸國奉土歸朝無為他人取富
貴資保勗不聽及宋將慕容延釗等征武陵道出荊口
保寅奉牛酒犒軍太祖嘉其功驛召赴闕除將作監充
內作坊使賜第一區俄知宿州乾德四年丁母艱起復
轉少府監開寶五年知懷州歷司農衛尉二卿是州本
隸河陽時趙普為帥與保寅素有隙事多抑制保寅心
不能平手疏請罷支郡之制宋太宗從之頗韙其言又

為西川諸州都巡檢使改光祿卿歷知同汝二州改光
化軍卒年六十八計聞朝廷賻錢十萬廢朝一日初保
寅在懷州日蘇易簡王欽若並童年始趨學在同州錢
若水為從事在光化軍張士遜其邑人也保寅皆加獎
拔許以遠大之器世多其能知人子輔政輔之輔堯輔
國並進士及第

保緒文獻王第

缺

子繼冲時官左衙都將入宋擢鴻臚

少卿

保節文獻王第_缺子也生而穎異官右衙都將娶功臣

王保義女納土後宋除為司農少卿

保遜事繼冲為牙將文獻王子也入宋太祖命為左監門衛將軍

保衡文獻王第_缺子累官巴州刺史及繼冲納土宋改

為歸州刺史

保膺亦文獻王子起家知峽州事入宋署為本州刺史繼充貞懿王之子也貞懿王二子長曰繼冲次曰繼充

繼充官至歸州刺史又有高繼申者宋初為大理卿疑亦南平諸從也以世系未詳姑闕畧焉

武信王五女失其名相傳五女俱幼年好道薙髮為女僧各止一處一曰佛華寺一曰菩提寺一曰莊嚴寺一曰石佛寺一曰法輪寺

王保義

司空薰

倪可福

鮑唐

王保義江陵人武信王署行軍司馬與司空薰梁震同為賓客多所裨益文獻王時襄州安從進叛晉結援于

王王外為拒絕而陰實與之相通及從進來乞師王知大小之勢不敵遂陽責以大義且以禍福諭焉從進不寤于是誣王有異志保義力勸王白其狀願舉兵助晉以釋晉主之疑識者韙之累官武泰軍留後改平江軍節度使子貞範惠範延範有傳

司空薰其先臨淮人唐知制誥圖之族子也武信王鎮荆南薰與梁震王保義等偕居莫府遇事時多匡正梁亡唐莊宗入洛下詔慰諭藩鎮薰固勸武信王朝京師

用結唐主心時梁震切諫不可而武信王卒從薰言幾不得脫歸然唐舍江陵而竟先滅蜀者亦薰一言力也薰後事不見于史未詳所終

倪可福

江陵志餘作倪福可非

人也唐天祐三年武信王權

荆南留後而可福時為駕前指揮使會朗州雷彥恭屢犯荆南梁王全忠遣可福率官兵五千人戍之可福指畫方略力拒彥恭朗兵稍稍引去已而又築寸金堤激

水捍蜀有功

江陵志餘云寸金堤在西門外將軍倪福可所築謂其堅厚寸寸如金也

武信

王愛其勇使隸戲下為親校且以女妻可福子心相得

也可福摧鋒陷陳所向克敵李洪來寇江陵可福以兵

擊敗之推為首庸俄遷都指揮使龍德時江陵城圯可

福以卒萬人修外郭不時築武信王責功程之慢杖之

百歸謂女曰幸語汝舅吾欲威衆辦事耳非示辱也以

白金百銖遺之

按楚志云可福季興壻也築城愆期季興怒奪其妻可福併力完之高乃盛為

裝奩遣還今從通鑑所載楚志似誤

可福竟以功名終賜田于江陵東三

十里子孫聚居其處號曰諸倪岡

江陵志餘云諸倪岡有轉魚臺乃將軍倪

福可故宅又云倪軍市在城東六十里倪福可屯軍之所
地有八井歲久堙沒又有倪將軍廟在城西五里以其
有修隄功故祀之

鮑唐故梁復州知州為吳將李簡所執已而歸武信王
武信王俾同倪可福隸戲下遂與可福齊名

梁震

孫光憲

梁震邛州依政人也初名雷會唐郎中劉象隨僖宗入
蜀震以所業詩詣象象曰君才思敏妙定成大器若不
更名將慮小阻緣製名雨下從謁以雨謁人未得輒見

請易震字震從辰辰者龍也龍遇雨變化必矣因改今
名未幾登進士第流寓京師梁開平初歸蜀道過江陵
武信王喜其才識留之不遣欲奏為判官震自以唐臣
耻為強藩屬吏即亡去又恐及禍乃曰震素不慕榮宦
明公不以震為愚必欲使參謀議但以白衣侍樽俎可
也王心重之俾與司空薰王保義同為賓客而震獨不
受辟署稱前進士王亦時時呼為先輩唐莊宗滅梁薰
等咸從史王朝京師震堅沮以為不可曰唐有併吞天

下之志嚴兵守險猶恐不自保况數千里入覲乎且大王梁室故將安知彼不以讐敵相遇行當為鹵爾王不從而束身朝唐卒斬關始得出歸謂震曰不用君言幾不免虎口及唐師滅蜀王方食落箸而嘆曰老夫過也震曰唐主得蜀益驕亡無日矣安知不為我福已而莊宗果罹鄴都之禍由是益加親信明宗時唐遣房知溫領軍入犯武信王伺其兵少欲開城盡殲之震諫曰朝廷禮樂征伐所出兵雖少而勢甚大加四方諸侯各以

吞噬為志若大王不幸得戰勝則中朝徵兵四方其誰不欲仗順而取大王土地邪為大王計莫若致書主帥且以牛酒為獻然後上表自劾如此庶幾可保會王寢疾不起文獻王繼立尤委任震以兄禮事之震常謂王為郎君一日王語震曰吾自念平生奉養已過今欲捐一切玩好以經史自娛省刑薄賦境內以安是吾願也震知王克勝厥任因曰先王待我如布衣交以嗣王屬我今幸不墜先業吾老矣不復事人矣固請退居監利

王為之築室于土洲上

江陵志餘名梁家臺

震披鶴氅逍遙若仙

自稱荆臺隱士

堯山堂外紀曰震晚年稱荆臺隱士題院中壁云桑田一變賦歸來爵祿焉能

浼我哉黃犢依然花竹外清風萬古凜荆臺

每詣府輒跨黃牛至聽事以為

常王亦時過其家斗酒相勞歡叙平生四時賜予甚厚

遂以是終其天年所著文集一卷行世先是有薛少尹

者擅相人之術震同進士董與杜無隱往叩薛曰梁秀

才此舉必捷然登第後一命不沾也後竟如其言繼震

輔政者則有孫光憲

孫光憲字孟文貴平人

北夢瑣言作富春人

家世業農至光憲獨

讀書好學唐時為陵州判官有聲天成初避地江陵武
信王奄有荆土招致四方之士用梁震薦入掌書記王
方大治戰艦欲與楚角光憲諫曰荆南亂離之後賴公
休息士民始有生意若又交惡於楚一旦他國乘吾弊
良足憂也王乃止文獻王立會梁震乞休悉以政事委
光憲王居恒羨馬氏豪靡謂僚佐曰如馬王可謂大丈
夫矣光憲曰天子諸侯禮有等差彼乳臭子徒驕侈僭

汰取快一時危亡無日又足慕乎王忽悟曰公言是也
為悔謝者久之光憲事南平三世皆處幕中累官荆南
節度副使朝議郎檢校祕書少監試御史中丞賜紫金
魚袋繼冲時宋使慕容延釗等平湖南假道于荆約以
兵過城外大將李景威勸繼冲嚴兵備之光憲叱之曰
汝峽江一民爾安識成敗中國自周世宗時已有混一
天下之志况聖宋受命真主出邪王師未易當也因教
繼冲去斥堠封府庫以待悉獻三州之地宋太祖嘉其

功授光憲黃州刺史賜賚加等在郡亦稱治乾德末卒

光憲博物稽古先是唐元和中裴宙鎮荊州掘地得一

石規模悉倣江陵城制命徙置他所輒淫雨不止仍復

舊處天乃霽一曰文獻王經其地顧問光憲光憲曰昔

伯禹治水自岷至荆定彼泉源之穴慮萬世下或有汎

濫爰以石屋鎮之耳王大加嘆賞益重之性嗜經籍聚

書凡數千卷或自鈔寫孜孜校讐老而不廢自號葆光

子所著有荆臺集橘齋集玩筆傭集鞏湖編玩北夢瑣

言蠶書若干卷

容齋三筆載有貽子錄疑亦光憲輩誤

又誤續通歷紀事

頗失實太平興國初詔毀之光憲素以文學自負處荆南快快不得志常慕史氏之作頗恨居諸侯莫府不足展其才力每謂知交曰寧知獲麟之筆反為倚馬之用

光憲又雅善小詞蜀人輯花間集采其辭至六十餘篇

子謂謹○光憲常諫保勗曰宋有天下詔書皆合仁義湯武之君也公宜克勤克儉勿奢勿僭上以奉朝廷中以嗣祖宗下以安百姓見長編

論曰南平起家僕隸而能折節下賢震以謀畧進光憲

以文章顯卒之保有荆土善始善終區區一隅歷世五

缺

亦得士力哉

十國春秋卷一百二

欽定四庫全書薈要卷八千六百六十九

史部

十國春秋卷一百三

檢討吳任臣撰

荆南四

列傳

李載仁

倪從進

王貞範

王惠範

弟延範

康張

魏璘

王昭濟

王崇範

李載仁唐室之遠裔也開平初避亂來江陵武信王署為觀察推官自負才學深為王所嘉賞從容接待禮遇

有加然性迂緩頗不厭衆心文獻王時稍遷至郎中一

日赴王召甫上馬而部曲相毆載仁怒急命于厨中索

飯及豕肉令毆者對食仍戒曰苟再犯必當于豕肉中

加酥聞者咸以為笑又與妻閤異室而處一日閤忽叩

閤至載仁亟取百忌歷視之大驚曰今夜河魁在房那

可就宿其舉止多此類也及孫光憲掌書記牋奏書檄

皆出載仁右載仁充位而已由是與光憲有隙光憲稍

稍避之人以光憲為長者

載仁常為光憲言曾目睹梁相張策弟簾輕易道教因脫

襲服挂天尊臂上戲云為我掌之俄頃精神恍惚
似遭毆擊痛叫狼狽歸至別業而卒亦異事也

倪從進武信王之子婿也父可福為武信王大將從進以
蔭得官復娶王女甚貴寵一時皆艷慕之功臣子與王家
為昏姻可知者王保義子惠範及可福子從進凡二人云
王貞範平江節度使保義子也事文獻王為推官累官
少監素精于春秋有駁正杜預左傳註數百條人多訝
之獨與同官孫光憲說春秋義合兩人心相得也女弟
故所稱荆南仙女者恒時夢異人授琵琶樂曲二百餘

調命曰此曲譜屬元昆製序當刊石于甲寅之方于是
貞範如女弟指為製序刊所傳曲有道調玉宸宮闕則
宮神林宮蕤賓宮無射宮玄宗宮黃鍾宮散水宮仲呂
宮商調獨指泛清商紅銷商風商林鍾商醉吟商玉仙
商高雙調商角調醉吟角大呂角南宮角中宮角蕤
賓角羽調鳳吟羽風香羽應聖羽玉宸羽香調大呂
調而曲名間有同人世者如涼州渭州甘州綠鬣莫
艱傾盆樂安公子水牯子阿泛濫之屬摹本流傳一時

咸詫以為異

王惠範亦保義子也善修飾喜讀書以門蔭為文學遷
觀察推官文獻王妻以女且以惠範本將家子命掌幕
中內外軍政惠範豪邁不羈頗以簿書符牒為俗務入
告王辭之自是以王為不知己凡軍府大事皆不參預
但以金帛購古書圖畫日披翫為志焉弟延範形貌竒
偉性任俠家富於財好施不倦文獻王署為太子舍人
後從繼冲入宋官大理丞知泰州太平興國中為廣南

轉運使

康張事文獻王為硤州長陽令有良吏才一邑稱治與少監孫光憲時相往還云

魏璘不知其家世事貞懿王為指揮使勇畧絕倫顯德中周世宗南征徵兵于王王命璘帥兵三千人趣夏口以會周師居二年周與唐構兵璘復統戰艦五百艘駐鄂州以助戰周主嘉貞懿王功優詔慰諭荆南自倪可福鮑唐之後故推璘為名將同時又有客將陸扶者驍

果亦亞于璘王昭濟故客將也宋師既入江陵繼冲命昭濟與蕭仁楷奉表納土宋太祖嘉其功署昭濟左領軍衛將軍仁楷亦除供奉官後不知所在

王崇範事繼冲為支使納土後遣崇範詣闕貢金器五百兩銀器五千兩錦綺二百段龍腦香十斤錦繡帷幕二百事宋太祖擢崇範節度判官終于其職

李景威

梁延嗣

李景威荊州長陽人也文獻王時未知名及仕貞懿王

擢水手都指揮使繼冲代保勗節鎮景威時為帳下親校會湖南張文表之亂周保權求救于宋宋命慕容延釗等往討復詔江陵發水軍赴潭州繼冲遣景威將兵三千人以待未幾宋師假道荆南聲言兵過城外景威曰兵尚權譎城外之約其可信乎以臣觀之直欲乘釁伐我耳方今精卒數萬訓練甚備莫若嚴兵整旅以禦之臣雖不才願盡以相付少監孫光憲固謂不可景威出而歎曰吾言不用大事去矣何用生為因扼吭而死

宋太祖聞之曰忠臣也命王仁贍厚卹其家先是景威語繼冲云舊傳江陵諸處九十九洲滿百則王者興武信王之初江心深浪中忽生一洲今此洲遽爾漂沒若可憂也繼冲殊不為意遂至于亡國

梁延嗣京兆長安人

三楚新錄云復州景陵人

唐同光中將兵守復

州監利

按五代史云監利故屬復州梁割隸江陵據此則武信王得監利之後始屬荊州矣

武信

王之朝唐也莊宗欲陰圖之既疾趨歸遂以兵攻監利

星沙二縣延嗣兵敗為王所獲至文獻王立擢為大校

承制授歸州刺史已又領復州團練使仍掌親軍歷事

貞懿王及保勗保勗疾革召延嗣語之曰我疾遂不起

兄弟中孰可寄後事者延嗣曰公不念貞懿王乎先王

寢疾以軍府付公今先王子繼冲長矣保勗曰子言是

也即以繼冲判內外兵馬繼冲之得立延嗣功居多焉

及繼冲納土延嗣與孫光憲實勸之宋以歸順功授復

州防禦使充湖南前軍步軍都指揮使兼排陳使後因

郊禮自復州入朝太祖慰撫之曰使高氏不失富貴爾

之力也改濠州防禦使有善政詔書褒美延嗣頗知書好接士常暴疾禳于城隍神是夕夢神人告以九九之數俄疾愈年八十一卒延嗣起家行伍居恒諱健兒士卒之語一日與孫光憲同赴毬場光憲上馬左右掖之者頗衆延嗣在後戲曰孰謂大卿年老而彌壯邪良由扶持力爾光憲回顧曰非是衆扶蓋是老健延嗣不勝怒論者少之

論曰江陵之失也景威絕吭以殉可謂忠矣延嗣力勸

納款俾高氏終保富貴其殆譙周之流歟然而為延嗣
易為景威難事故未可成敗論也景威真濁世之佼佼
者哉

溫克修 王處士

溫克修故江陵司藥庫吏也唐天復中與術者向隱處
隱告以江陵更變且無定主五年後東北上有人依稀
國親鎮此邦二十年他日又曰東北來者二十年後更
有一人五行不管此程更遠及武信王為荆南留後先

是賜姓曰朱隨復本姓果符國親之說天成二年唐軍圍江陵時文獻王以王子守城克修因以隱言白之文獻王未之信也明年武信王薨凡二十一年而文獻王襲位人以為其言有驗

王處士者不知何許人文獻王時居江陵以善卜名周晉王柴榮之未貴也以布衣與大商頡跌氏貨殖荆南一日過處士卜方布卦忽一著躍出卓然而立處士大驚曰吾家筮法十餘世矣每受高曾遺言凡卜筮自躍

而出者其人貴不可言况復卓立不傾得非為天下主乎遽起再拜榮雖陽為詰責而私心甚喜後果承郭氏之後踐皇帝位一如處士言

僧齊己

僧文了

荆南僧

僧齊己益陽人本佃戶胡氏子也

俗名胡得生

七歲居大瀉

山寺與諸童子牧牛天性穎悟常以竹枝畫牛背為詩詩句多出人意表衆僧竒之勸令落髮為浮圖時都官

鄭谷在袁州以詩名齊己攜所詩往謁有云自封修藥

院別下著僧牀谷覽之曰將改一字方可相見經數日
再過稱已改得云別掃著僧牀谷嘉賞焉結為詩友又
齊已有早梅詩中云昨夜數枝開谷為點定曰數枝非
早不若一枝佳耳人以谷為齊已一字師久之居長沙
道林寺湖南莫府號能詩者徐仲雅廖匡圖劉昭禹輩
靡不聲名藉甚而仲雅尤傲忽雖王公不避獨見齊已
必悚然不敢以衆人相遇齊已故贅疣至是愛其詩者
或戲呼之曰詩囊無何將遊蜀武信王習齊已名遮留

之龍德元年禮齊已于龍興寺署為僧正時降手牘慰

藉良厚然居恒多鬱鬱不樂僧虛中貽詩云老負峨嵋

月閑看雲水心蓋傷其志也齊已既托迹江陵惟事筆

墨自娛乃作渚宮莫問篇十五章以述懷頃之唐秦王

從榮召入侍中秋大宴齊已窺從榮藏異志有東林莫

碍漸高勢四海正看當路時之句幾以諷刺得罪已而

脫歸荆南賴武信王匿之獲免其不屈節侯王類如此

梁震晚年酷好吟咏尤與齊已善互相酬答齊已竟終

于江陵自號衡嶽沙門

一云齊已于豫章西山金鼓寺寂育塔存焉龍盤其書堂也

有詩八百首孫光憲序之命曰白蓮集齊已常于瀉山林下遇一僧于指甲下出二劍凌空躍去蓋劍俠也時時為人道之又同僧仰山住豫章觀音院作粥疏曰粥名良藥佛所贊揚義冠三檀功標十利更祈英哲各遂願心既備清晨永資白業禪流稱其辭謂當與食時五觀並傳

文了吳僧也雅善烹茗擅絕一時武信王時來遊荆南

金少師卷之三
卷一五三
延住紫雲禪院日試其藝王大加欣賞呼為湯神奏授
華定水大師人皆目曰乳妖

荆南僧失其名氏以鬻香為業清泰中貨平等香貧富
無二價居常絕不市香和合而篋中所貯都梁鬱金輒
取售無算人莫測其從來皆疑為仙者

荆南仙女

荆南仙女者平江節度使王保義女也兒時聰穎不凡
五歲通黃庭內外經及長善琵琶一夕夢涉水登山巔

見金銀宮闕中有仙人披羽服自稱曰麻姑傳以樂曲自是每夕輒夢遇之即指授音律歲餘得百餘調都非人間所曾有其尤者名獨指商以一指彈一曲更為擅竒已而適文獻王子保節復夢麻姑至曰即當相邀明日庭中聞雲鶴音樂仙女奄然而逝

十國春秋卷一百三

欽定四庫全書蒼要卷八千六百七十

史部

十國春秋卷一百四

檢討吳任臣撰

北漢一

五代史作東漢十國紀年及通鑑作北漢今從之

世祖本紀

世祖姓劉名旻高祖之母弟也同為章懿皇后所出

薛史

云崇高祖從弟晉陽見聞要錄云仲弟今据歐陽史曰母弟

初名崇為人美鬚髯目

重瞳子少無賴嗜酒好博常黥為卒高祖事晉為河東節度使署崇馬步都指揮使高祖即帝位除太原尹未

幾遷北京留守同中書門下平章事隱帝時改河東節
度使累加兼中書令隱帝年少政在大臣郭威為樞密
使有大功而與崇素不相能崇與屬吏鄭珙謀乃罷上
供征賦籍民為兵以自固乾祐三年隱帝遇弒崇業謀
舉兵會樞密使威反狀已白而隱帝諸大臣不即推尊
之故未敢即立謬請立崇子贊為嗣是時人皆知威非
實意而崇獨私心喜曰吾兒為帝吾又何求乃罷兵

按漢

隱帝實錄初議立徐帥太后遣中使馳諭劉崇請崇
入纘大位崇知立其子上章謙遜恐無此事今不取威

少賤黥其頸上為飛雀世謂之郭雀兒至是見崇使者
具道所以立贊之意因自指其頸以示使者曰自古豈
有雕青天子幸公無以我為疑崇益喜信以為然太原
少尹李驥勸其以兵下太行控孟津俟變崇大罵驥離
間父子命牽出斬之并殺其妻以其事白于太后以明
無它已而威果代漢是為周太祖降封贊湘陰公崇遣
牙將李訥奉書于周求贊歸太原周主報以湘陰比在
宋州今方取歸京師必令得所公勿為憂但能同力相

輔當加王爵永鎮河東崇知贇不得歸始有自立意

乾祐四年春正月戊寅帝即位于晉陽仍用乾祐年號

所有者并汾忻代嵐憲隆沁遼麟石諸州之地

案通鑑劉崇所

有者并汾忻代嵐憲隆蔚沁遼麟石十二州之地歐史職方考則云自太原以北十州為東漢而無隆蔚二州之名要而論之晉高祖割山前七州山後九州以畀契丹而蔚州實在其中則通鑑以蔚州為北漢有者誤也至隆州乃北漢所置備載地理表中今列其名以補歐史之闕以節度判官鄭珙為中

書侍郎觀察判官趙華為戶部侍郎並同平章事以次

子承鈞為侍衛親軍都指揮使太原尹以節度副使李

存瓌為代州防禦使裨將張元徽為馬步軍都指揮使
陳光裕為宣徽使是日周殺湘陰公贇于宋州帝以地
狹民貧祭祀祖禰畧如家人禮不建宗廟月俸宰相百
緡節度使三十緡其餘薄有資給是時遼將潘聿撚稱
君命遺書皇子承鈞帝令承鈞復書言本朝淪亡紹襲
帝位願循晉室故事求援北朝許之丙戌發兵屯陰地
黃澤圍柏丁亥以承鈞為招討使與副招討使白從暉
都監李存瓌將兵萬人侵周晉州帝聞湘陰公死大慟

哭為李驤立祠歲時祭之二月戊戌我兵五道攻晉州

周節度使王晏閉城不出承鈞令將士蟻附登城晏伏

兵奮擊我師敗績副兵馬使安元寶降周癸卯移軍攻

隰州周隰州刺史許遷遣步軍都指揮使孫繼業迎擊

於長壽村執我牙將程筠殺之未幾我兵薄州城攻數

日不克遂引還丁巳遣通事舍人李訥使于遼乞兵為

援三月甲戌訥至于遼遼主兀欲

即遼世宗也通鑑作永康王

與帝

約為父子之國使拽刺梅里來報聘己卯周遣敗卒二

百六十餘人還大原各賜衫袴巾履夏四月遼遣使來告周使田敏約歲輸錢十萬緡帝命宰相鄭珙以厚賂謝遼自稱姪皇帝致書于叔天授皇帝五月辛未珙卒于遼甲戌定難節度使李彝殷稱藩于我六月遼主遣燕王述軋政事令高勳遼史作燕王牒螭樞密使高勳冊命帝為大漢神武皇帝妃為皇后又以黃騮九龍十二稻玉帶報聘帝更名旻秋七月翰林學士衛融等詣遼謝冊禮且請兵九月招討使李存瓌自團柏擊周遼欲引兵來會與

諸將議于九十九泉諸將皆不欲南行遼主強之癸亥
行次新州之西火神淀燕王述輒及偉王之子太寧主
漚僧作亂弑其君兀欲丁卯齊王述律代立上尊號曰
天順皇帝改元應歷自火神淀入幽州遣劉承訓來告
哀帝命樞密直學士王得中如遼賀即位復以叔父事
之請兵以擊晉州隨遣使如遼行弔禮冬十月辛卯周
潞州巡檢使陳思讓敗我兵于虎亭甲辰遼遣彰國節
度使蕭禹厥率兵五萬來會帝帥兵二萬出陰地關攻

晉州

五代史王峻傳曰劉旻攻晉州峻為行營都部署至陝州劉不進太祖遣使者翟守素馳至陝州諭

峻欲親征峻屏左右謂守素曰晉州城堅不可近而劉旻兵銳亦未可當臣所以留此非怯也蓋有待爾且陛下新即位四方藩鎮未有威德以加之豈宜輕舉而充州慕容彥超反迹已露若陛下出汜水則彥超入京師陛下何以待之守素馳還具道峻言是時太祖已下詔西幸聞峻語遽自提其耳曰幾敗吾事乃止不行丁

未軍于城北三面置寨周巡檢使王萬敢龍捷都指揮使史彥超虎捷指揮使何徽共拒之十二月乙巳王峻引兵救晉州晉州南有蒙坑最險要峻憂我兵據之是

日聞前鋒已度蒙坑喜曰吾事濟矣

王峻傳曰峻軍出自絳州前鋒報過

蒙阮峻喜謂其屬曰蒙阮晉絳之險也曷不分兵扼之使吾過此可知其必敗也

帝攻晉州久

不克會大雪我軍乏食契丹兵思歸聞峻至燒營宵遁峻入晉州乃遣行營都指揮使仇弘超等將兵追于霍邑縱兵奮擊我兵大敗墜崖谷死者無筭周將藥元福曰劉旻悉發其衆挾契丹而來志吞晉絳今氣衰力憊狼狽而遁不乘此剪撲必為後患王峻遣使止之遂解去契丹兵至晉陽士馬什喪三四禹厥耻無功釘大將一人于市旬日而斬焉帝始息意于進取是時內供軍

國外奉契丹賦役繁重民不聊生逃入周境者甚衆

乾祐五年春正月遣兵侵周府州為防禦使折德辰所

敗

殺二千餘人

二月庚子德辰入寇陷岢嵐軍以兵戍之是

月帝置寧化軍于嵐州界又置雄勇鎮於其北備周師

也夏四月丙戌朔日食六月壬寅帝以周人犯邊遣使

求援于遼遼主命中臺省右相高模翰赴之冬十月甲

申朔遣使于遼進葡萄酒十二月癸未高模翰及我兵

圍晉州是歲麟州刺史楊崇訓歸款于周初崇訓父信

受命于周為刺史及信卒崇訓以州來降至是為羣羗

所圍叛去

後復歸于我

六年春閏正月壬午遣使謝遼以高模翰却周軍故也

三月庚辰朔南唐遣使貢遼因附書于我遼主詔達其

貢丁酉遣使進遼毬衣及馬夏五月壬寅遣使如遼言

石晉樹嗣聖皇帝聖德神功碑為周人所毀請再刻許

之秋八月遣使如遼乞援九月庚子貢藥于遼十一月

遼葬貞烈皇太后于祖陵帝遣使會葬冬十二月喬贊

侵周府州折德扆拒于城下我師敗績

乾祐七年春正月周主殂于滋德殿丙申晉王榮即皇

帝位帝聞周主晏駕遣使于遼謀大舉伐周二月遼遣

武定節度使政事令楊衮

遼史作政事令耶律敵

將鐵馬萬騎及

奚諸部兵五六萬人號稱十萬來會于晉陽

晉陽見聞錄云衮帥

騎六七萬號

十萬來會

帝自將兵三萬以義成節度使白從暉為

行軍都部署武寧節度使張元徽為前鋒都指揮使

周世

宗實錄作張暉領三

千騎為前鋒非是

與契丹兵南出團柏丁巳我兵屯

梁侯驛昭義節度使李筠遣牙將逆戰于大平驛張元
徽斬其將穆令均筠遁歸上黨三月我兵乘勝逼潞州
引兵而南是時周主新即位以謂我國幸周有大喪必
不能出兵宜自將以擊其不意周臣多勸其山陵有日
人心易搖不宜輕動周主曰以吾兵力之強破旻如泰

山壓卵耳

五代史馮道傳劉旻攻上黨周世宗曰劉旻少我謂我新立而國有大喪必不能出兵以

戰且善用兵者出其不意吾當自將擊之道乃切諫以
為不可世宗曰吾見唐太宗平定天下敵無大小皆親
征道曰陛下未可比唐太宗世宗曰劉旻烏合之衆若
過我師如山壓卵道曰陛下作得山定否世宗怒起去

卒自將擊旻

遂銳意親行癸巳前鋒與我兵遇于高平南之

高原

周世宗實錄云甲午賊陳于高平南之高原今從十國紀年作癸巳

我兵少却周主

趣諸軍亟進帝以中軍陳于巴公原張元徽居東偏楊

衮軍西偏而周師亦列為三陳李重進白重贊將左樊

愛能何徽將右向訓史彥超居中央張永德以禁兵衛

周主周主介馬自督戰衮望周師謂帝曰勅敵也未可

輕動帝奮髯曰時不可失請公勿言衮怒而去時東北

風方盛俄而遽轉南風副樞密使王延嗣使司天監李

義白帝云時可戰矣帝從之號令東偏先進王得中叩

馬諫曰義可斬也南風勢急非北軍之利宜少待帝怒

即麾元徽戰元徽擊右軍兵始交周將愛能徽引騎兵

先遁右軍潰于是步卒數千餘人棄甲來降元徽呼萬

歲聲振川谷敵兵大駭周主忽赫怒躍馬入陳引五十

人直衝帝之牙帳帝方張樂飲酒示閑暇及其奄至殊

驚惶失次周主因親犯矢石督戰士士莫不以一當百

奮勇爭先周將趙匡盾馬仁瑀馬全义及永德等摧鋒

陷陳勢不可遏帝趣元徽進兵會馬躡元徽為周兵所
殺我軍由是氣奪帝自麾赤幟收軍軍驟退不能止互
相蹂躪遂大敗日暮帝收餘兵萬人阻澗而守是時劉
詞將周之後軍未至及戰已勝而詞軍繼至復乘勝擊
我兵王延嗣死之帝又大敗輜重器甲乘輿服御物皆

為周人所獲

五代會要云周廣順三年六月河南河北諸州旬日無鳥既而聚澤潞之間山谷中

集于林木壓樹枝折至顯德元年河東劉崇為周師所敗伏屍血流故先萌其兆

丁酉周主至

潞州帝自高平被褐戴笠乘契丹所贈黃騮率百餘騎

由鵬窠嶺間道馳去夜失道山谷間得村民為鄉導誤

趣晉州行百餘里乃覺遂殺導者晝夜兼行所至得食

未舉箸或傳周兵至輒倉皇而去帝衰老力憊伏馬上

馳驟殆不能支僅得循他道以歸是役也衮畜怒按兵

西偏不戰故獨全軍而返

陶岳五代史補曰劉崇觀周世宗兵少詔諸將曰吾觀周

師易與耳契丹之眾宜弗使但以本軍決勝不惟破敵亦足使契丹見而心服乃使人謂契丹主將曰柴氏與

吾主客之勢已見必不煩足下餘刃敢請勒兵登高觀之可也契丹不知其謀從之洎世宗之入陣也三軍皆

賈勇爭進契丹望而畏之故帝歸為黃駟治廐飾以金

不敢救今從薛氏五代史

帝歸為黃駟治廐飾以金

銀食以三品料號自在將軍庚子帝收散卒繕甲兵完
城塹以備周楊衮將其衆北屯代州帝遣王得中送衮
歸因求救于遼遼主遣得中還報許發兵救晉陽壬寅
周以符彥卿為河東行營都部署郭崇副之向訓為都
監李重進為馬步都虞候史彥超為先鋒將步騎二萬
發潞州入寇又命王彥超韓通自陰地關入與彥卿合
又以劉詞為隨駕都部署白重贊副之是月昭聖皇太
后李氏殂于汴京西宮夏四月孟縣降周乙卯汾州防

禦使董希顏叛降于周丙辰遼州刺史張漢超叛降于

周周主初遣符彥卿等內侵但欲耀兵晉陽城下洎周

師入境百姓爭言我國賦役過重願供軍須助攻太原

周主始有兼并之意既而周諸軍數十萬剽掠不已百

姓失望更保聚山谷辛酉憲州刺史韓光愿嵐州刺史

郭言舉城降彥卿壬戌周王彥超等陷石州執我刺史

安彥進癸亥沁州刺史李廷誨降周庚午周主發潞州

趣太原癸酉忻州監軍李勅叛殺我刺史趙臯及遼通

事楊耨姑舉城降周周以勅為忻州刺史五月乙亥遼遣南院大王撻烈來援丙子周主至太原旗幟環城四十里是日代州防禦使鄭處謙舉城降周先是楊衮疑處謙有二心使騎兵守城門處謙殺之閉門拒衮衮奔歸遼遼主以其無功囚之處謙遂叛丁丑周置靜塞軍于代州以處謙為節度使契丹屯數千騎于忻代間為我援兵庚辰周主遣符彥卿擊之彥卿入忻州契丹退保忻口丁亥周置寧化軍於汾州以石沁二州隸焉丁

酉撻烈敗彥卿于忻口周代州將桑珪等誣鄭處謙通
遼殺之時王得中自遼返留代州珪并執送于周軍周
將史彥超與契丹戰死周主初來攻晉陽彥卿彥超北

控忻口以斷契丹援路而晉陽城方四十里周師去城
三百步圍之匝百計攻之不能克彥卿既數為契丹所
挫至是復以身殉周主于是徵懷孟蒲陝丁夫數萬亟

攻晉陽會久雨士卒皆罷病乃議引還

按周世宗實錄
會大雨軍士勞

苦又聞忻口之師不振帝數日憂沮不食遂決還京之
意又晉陽見聞錄云六月旦周師南轅反旆惟數百騎

間之以步卒千人長槍赤甲銜趨捷跳梁於城隅晡晚殺行而抽退今從周世宗實錄 甲辰周殺

我樞密直學士王得中乙巳周主班師發太原周匡國節度使藥元福言于周主曰進軍易退軍難周主曰一以委卿帝出兵追之元福乃勒兵成列而殿我師敗績

周盡棄所得州縣惟桑珪據代州不下

珪既叛我又不敢歸周故嬰城

自帝遣兵攻拔之是役也周主與帝相拒于高平豫令前澤州刺史李彥崇將兵守江豬嶺遏帝歸路彥崇聞樊愛能等南遁引兵退至是帝果自其路走太原周主

貶彥崇為率府副率指樊愛能何徽等責之曰若輩累朝宿將非不能軍正欲以朕為奇貨賣與劉旻耳悉斬以徇壬申帝以高平之敗已而被圍憂憤成疾悉以國事委皇子侍衛都指揮使承鈞六月癸亥撻烈獻所獲軍實于遼秋七月乙酉我國人有為契丹誤掠者遣使請于遼遼主詔悉歸之九月丙申以周人盜邊告于遼冬十一月遼彰國節度使蕭敵烈太保許從贇奏忻代二州之捷于遼是月帝疾革命皇子承鈞監國尋殂

案大

定錄周顯德二年春旻病死紀年通譜乾祐八年冬崇死遼史應歷五年十一月乙未朔漢主崇殂皆乙卯年也又周世宗實錄及薛居正五代史僭偽傳亦云顯德二年十一月劉崇卒惟王保衡晉陽見聞要錄云甲寅年春南伐敗歸夏周師攻圍旻積憂勞成心疾是冬卒保衡故旻舊臣言當足信今從其說

帝生于

唐乾寧三年乙卯歲年六十

晉陽見聞要錄云乙卯生卒年六十一當是衍一字

廟號世祖在位凡四年

論曰世謂世祖常致書于周求立子贇而不得後方稱帝推其志是不以喪君為讎而以殺子為讎也要之贇得立則漢祀未斬贇故不獨為世祖子矣懼劉氏之餒

而保一隅以圖存其志洵有足悲者高平之戰僅以身
免所不亡者天耳然則歷四君而卜年三十嗚呼夫豈
盡人力也哉



十國春秋卷一百四



總校官庶吉士臣張能照

校對官檢討臣王鍾健

謄錄貢生臣李敬敏